

URDEN DA SCOLA

GENERAL

1. fegnameira da scola

La "Scola da musica Grischun Central" (SMGC) è en'instituziun da scolaziun per unfants, giuvenils e carschias. Ella vign purtada dalla "Regiun Albula" ed è en'instituziun digl dretg public. Igl scopo è da sviglier igl plascheir da cantar e sunar, da procurar per ena scolaziun fundamentala solida, da porscher ena scolaziun alla nova generaziun per las nossas uniuns, la promoziun da talents e d'organisar e realisar activitads da musica.

2. structura

La SMGC è ena scola da musica regiunala e cuntigna ena scolaziun fundamentala da musica, instrucziun instrumentala/vocala scu er cantar e sunar an cuminanza.

ISTRUCZIUN

3. purscheida d'instrucziun

La SMGC sa sprova da porscher en'instrucziun instrumentala/vocala diversa e multifaria.

4. furmas d'instrucziun

La scolaziun fundamentala da musica vign instrueida an gruppas (gruppa minimala da 5 unfants). L'instrucziun instrumentala/vocala ò li an furma individuala u an gruppas pitschnas. Cantar e sunar an cuminanza, aint igls divers ensembles dalla SMGC, complementescha l'instrucziun ordinaria.

5. lis d'instrucziun

La scolaziun fundamentala da musica vign instrueida schi pussebel ainten chels cumegns tgi magnan ena scoligna e/u scola primara (scalem bass). Per l'instrucziun instrumentala/vocala ègl basigns d'aveir en pensum da minimum 5 lecziuns agl de digl madem rom per porscher chella an vischnanca. Sur excepziuns argumentadas decida la direenziun dalla scola da musica.

6. salvs d'instrucziun

Igls cumegns, noua tgi vign instruia, sa sprovon da metter an disposiziun localitads adequatas.

7. material d'instrucziun

Mintga cume gn, noua tgi vign purschia la scolaziun fundamentala da musica, metta a disposiziun en instrumentari dad Orff. Procurar instrumaints, notas e tgossas supplementaras per l'instrucziun instrumentala/vocala è tgossa digl scolar sez. Per la musica d'ensemble metta la SMGC a disposiziun igl instrumentari spezial (battareia, paucas, instrumaints da bass, ranfuzaders etc.).

8. taimps d'instrucziun

Igl onn da scola da musica cuntigna 2 semesters da 18 emdas instrucziun (avost anfignen schaner, favrer anfignen fanadour). Igl taimp d'instrucziun e la dirada dalla lecziun decidan per regla igl scolast da musica ed igl scolar da musica (lecziuns da 30, 40, 50 u 60 minutas per emda). Per l'instrucziun da musica vala igl plan da vacanzas dalla SMGC.

Pò l'instrucziun causa d'ena situaziun extraordinaria (pandemia, curantegna, burasca, catastrofas, cass da ghera, devastaziun digls salvs d'instrucziun e.o.p.) betg veir li scu usito, ò la direcziun da scola igl dretg, dad ordinar l'instrucziun a distanza. L'instrucziun da preschientscha ed a distanza è equivalenta. Per l'instrucziun a distanza na vign betg restitua taxa da scola.

SCOLARS/AS DA MUSICA

9. antrada

La SMGC è averta per unfants, giuvenils e carschias. Igl formular d'annunztga pò neir retratg dalla direcziun da scola ni scargea da nossa homepage. En scolar vala scu annunztgia, schispert tgi l'annunztga è inoltrada an scretg. Tar l'annunztga sur internet è chella valevla cun agiuntar igl nom digl/dalla autoriso/ada d'edutgier aint igl spazi "nom digls genitours" respectiv cun cunfirmar d'esser ancletg cun igl urden da scola actual. La direcziun da scola reparta la nov'annunztga agl scolast da musica. Igl scolast da musica aveisa igl scolar e fixescha cun chel igl urari. Schi l'annunztga vign retratg siva dall'antschatta dall'instrucziun e siva d'aveir fixo igl urari cuagl scolast, stò la taxa da scola neir paeda. Cun la sottascripziun segl formular d'annunztga s'oblieschan igls genitours/scolars da visitar l'instrucziun igl minimum durant en semester, da respectar igls reglamaints ed igl urden da scola e da paer la taxa da scola ainfra en meis siva dalla facturaziun.

10. sorteida

Sorteidas scu er midadas digl rom e/u scolast e midadas da dirada da lecziun pon angal neir fatgas alla fegn d'en semester. Mintga midada ò da neir inoltrada an scretg en meis avant la fegn digl semester (fegn december e fegn da matg). Sorta en scolar durant igl semester, na pò el betg pretender ena reducziun dalla taxa da scola. Suonda nigna dennunztga an scretg, è igl scolar annunztgia per en ulterior semester ed ò da paer la taxa da scola.

Sch'igl scolar bandunga la regiun Albula durant igl semester vignan angal mess a chint las lecziuns visitadas. Ena tala midada stò pero neir annunztgeida schi bod pussebel alla direcziun da scola.

11. exclusiun

Scolars tgi visetan l'instrucziun betg an rughel ni tgi disturban antras lour deportamaint son neir exclus dalla SMGC; durant en taimp limito u er per adegna. Igl madem vala er schi la taxa da scola na vign betg paeda. An chels cass i dat nign dretg da restituziun. Sur d'ena exclusiun decida la cumischung da musica dalla SMGC.

12. exerchezis practics

Mintga scolar dess veir occasiun d'exercitar da sunar avant publicum, chegl aglmanc eneda durant igl onn da scola.

13. taxa da scola

La taxa da scola sa drezza tenor las ordinaziuns dalla SMGC. La taxa da scola vign fixada dalla cumischun da musica e mess a chint mintgamai all'antschatta digl semester per pauschal 18 lecziuns. Frequentan unfants u giuvenils anfignen 20 onns dalla madema famiglia ple tgi dus roms (ensemble chinta scu rom), vign do en rabat da ples roms da 10% per rom (scolaziun fundamentala da musica na chinta betg scu rom).

Dumondas per ena reducziun dalla taxa da scola on da neir drizzadas alla direcziun da scola.

14. lecziuns crudadas or

- Per muteiv digl scolast

È igl scolast sfurzo da sistar l'instrucziun per muteivs impurtants, è'l obliia d'avisar igls scolars e la direcziun da scola scu er da piglier siva las lecziuns. Lecziuns tg'igl scolast so betg instrueir per muteivs da sarvetsch militar/malsogna/discletg e tgi son betg neir pigleidas siva, vignan scuntradas dalla taxa da scola.

- Per muteiv digl scolar

Ègl betg pussebel agl scolar da frequentar l'instrucziun, ò el da sa stgisar tigl scolast igl pi tard igl de avant. Tar malsogna u discletg tgi cozza minimum quatter emdas l'enga siva l'otra, pon igls genitours inoltrar ena dumonda an scretg (cun attest digl medic) per restituziun parziala dalla taxa da scola alla direcziun da scola. Lecziuns betg frequentadas durant las vacanzas tgi na correspondan betg allas vacanzas dalla scola da musica e durant activitads extraordinarias dalla scola populara, vignan messas a chint sainza tg'igl scolast da musica seia obliia da las piglier siva.

- firos

L'instrucziun tgi scroda causa d'en firo naziunal u communal (tgi na croda betg aint igl taimp da vacanzas) vign paeda agl scolast da musica e vign mess a chint agl scolar da musica.

Firos nazionals: Bumang, amprem da schaner, Venderde sontg, Glindesde-Pasca, Anzainsas, Glindesde-Tschuntgesmas, Festa naziunala, amprem avost, Nadal, igls 25 e Son Stefan igls 26 da december.

Tar firos communsals scroda l'instrucziun angal an igls cumegnans pertutgias (varda plan da vacanzas).

DIVERS

15. siaranzas

La siaranza per scolar e pigl agen instrumaint è igl fatg digls genitours.

16. registraziuns da tung e maletg

Cun l'annunzta èn igls scolars resp. lour genitours ancletgs, tgi la SMGC possa publicgier registraziuns da tung e maletg fatgas durant las preschentaziuns dalla SMGC an agens stampats e medias online.

17. divergenzas d'opiniuns

Igl success dall'instrucziun n'è betg angal dependent digl talent e dalla diligenza e premura digl scolar, mabagn er digl sustign digls genitours. Sa fon valeir difficultads, dessan igls genitours an amprema lengia tschartger igl discurs cuagl scolast da musica e pir siva sa drizzar alla direcziun da scola. Tar differenzas d'opiniuns tranter scolast da musica, scolar e genitours ò igl scolast da musica d'avisar a taimp la direcziun da scola respectivamaintg la cumischun da musica dalla scola da musica.

Chel urden da scola vo an vigour cuagl conclus dalla cumischung da musica dalla SMGC digls 4 d'otgover 2021 e ramplazza tottas versiuns pi viglias.

Aaron Wasescha
president dalla cumischung da musica

Lucas Margreth
vicepresident dalla cumischung da musica